

開放文學 – 歷代筆記 – 奴才小史 多隆阿

多隆阿，字禮堂，隸黑龍江部伍。咸豐初，徵兵邊徼，應募入關。以參領，屬僧格林沁部下。既奉檄南援，遂隸江寧將軍都興阿。武昌、九江、安慶之戰，喋血數年，與鮑超俱以善殺漢人聞，故當時稱多鮑焉。同治元年，陝西回教徒起事，廷命勝保督軍西征。勝保在皖北時，頗稱強悍。及至關中，則銳氣頓挫，株守省垣，日縱淫樂，不復言戰事。言官交章彈劾，乃逮保至京，而以多隆阿代之。多隆阿既至陝西，聞回教徒在渭北者居多，遂徑趨渭北。

連戰三日夜，奪獲器械馬匹甚夥。渭北之羌柏、蘇家溝、渭城亦為多隆阿所取。回教徒乃西走甘肅。多隆阿方欲率軍登隴，而由滇至蜀，由蜀至陝之藍大順黨驟然出山，據周至及鄠縣。

多隆阿乃移師而南。周至甫下，而左目已為彈所傷，旬餘，卒於軍。時同治三年四月也。清廷諡以忠勇。而是時駐防西安之旗人，皆銜恨入骨者，亦有故。